

PENYATA KORPORAT



Firman Allah S.W.T dalam Surah As-Saf ayat 4 yang bermaksud:

"Sesungguhnya Allah mengasihi orang-orang yang berperang untuk membela agamaNya, dalam barisan yang teratur rapi, seolah-olah mereka sebuah bangunan yang tersusun kukuh."

Segala puji-pujian hanya kepada Allah SWT, selawat dan salam ke atas Nabi Muhammad SAW, ahli keluarga dan para sahabat baginda. Alhamdulillah, terlebih dahulu pihak kami ingin merafa'kan rasa kesyukuran kehadrat Allah SWT di atas limpah rahmat dan kurnia-Nya, AWQAF Holdings Berhad sebagai sebuah institusi Waqaf Korporat terus diberi kekuatan untuk berkhidmat bakti mencurah tenaga dan masa meneruskan tugas yang diamanahkan. Walaupun berdepan ujian sukar dalam menongkah pelbagai halangan terutamanya cabaran pandemik COVID-19, institusi ini terus berusaha mengembangkan peranan dan menjalankan tanggungjawab dalam mengimarahkan syiar Islam melalui penjanaan pembangunan sosioekonomi demi mengukuhkan kesejahteraan ummah sejagat.

Impak pandemik ini mencetuskan perubahan kepada hampir seluruh landskap sektor ekonomi dan kesihatan di Malaysia mahupun seluruh dunia. Antara inisiatif awal AWQAF adalah dengan melancarkan Wakaf Khas COVID-19 bertujuan untuk pembelian mesin ventilator. Mesin tersebut telah diserahkan kepada Unit Rawatan Rapi (ICU), Hospital Kajang yang ditentukan kegunaannya oleh Kementerian Kesihatan Malaysia (KKM) dengan kerjasama MERCY Malaysia. Sebanyak RM25,445.00 telah disumbangkan oleh para pewakaf melalui Wakaf Khas COVID-19 ini. Selain sumbangan wakaf tersebut, tidak terlambat juga untuk kami menyeru agar semua ahli AWQAF tidak ber lengah dalam mendapatkan vaksin COVID-19 sebagai usaha kita melawan virus tersebut. AWQAF menyokong sepenuhnya program imunisasi menyeluruh oleh pihak kerajaan bagi memastikan imuniti kelompok dapat dibentuk di dalam komuniti agar rantaian penularan jangkitan COVID-19 dapat diputuskan segera seterusnya menamatkan pandemik yang telah melanda seluruh dunia sejak tahun 2019.



Bagi pihak Ahli Lembaga Pengarah AWQAF, menyahut tuntutan norma baharu dan perubahan di luar jangkaan ini, AWQAF telah melihat semula keseluruhan operasi dan tadbir urusnya. Semua usaha penyelarasan disusun semula menerusi proses pengukuhkan institusi wakaf ini supaya memiliki daya saing, ketahanan serta struktur organisasi yang berupaya melepasi cabaran serta halangan masa depan yang semakin mencabar. Justeru, dengan menyediakan struktur, pelan dan strategi baharu, AWQAF mampu membina teras kekuuhan dan kekuatan institusi wakaf ini dalam mencapai matlamat penubuhan serta meraih kejayaan. Seperti yang telah disebutkan dalam Surah As-Saf - ayat 4 di atas, dalam berdepan dengan ujian memulihkan semula ekonomi Malaysia yang sedang bergelut dengan pandemik COVID-19 dan pada masa yang sama harus terus membela agama, AWQAF akan sentiasa melaksanakan keperluan kepada susun atur organisasi yang kukuh dan berstruktur (structure), urus tadbir yang mantap (good governance) dan mengutamakan ketelusan dalam keputusan (transparency).

Telus dan berintegriti adalah ciri-ciri nilai yang sangat dititikberatkan oleh komuniti masa kini. Justeru itu, suka bagi kami memaklumkan tentang pelantikan Dr. Ridzwan Bakar sebagai Pengerusi Jawatankuasa Audit Awqaf Holdings pada Julai 2020, bagi memastikan adanya semak dan imbang dalam pengurusan institusi wakaf ini serta memastikan risiko dalam setiap pelaburan diperhalusi secara telus serta mematuhi piawaian operasi standard yang ditetapkan. Langkah menambahbaik jawatankuasa itu juga merupakan satu inisiatif proaktif bagi memastikan kepercayaan orang ramai terhadap pengurusan AWQAF terus meningkat. Pengamalan tadbir urus yang baik adalah amat penting kerana AWQAF bukan sahaja menguruskan amanah malah turut mengurus kepercayaan orang ramai. Semoga pelantikan ini memberi keyakinan dan kepercayaan di kalangan ahli Awqaf untuk terus menyokong AWQAF di angkat ke satu aras kecemerlangan baru dalam memartabatkan agenda Waqaf

Korporat bagi umat Islam di negara ini.

Sesungguhnya, menerusi penerbitan Kenyataan Korporat ini, AWQAF sentiasa terbuka dan telus, menyampaikan segala maklumat berkaitan AWQAF dan perkhidmatannya kepada para ahli. Ketelusan ini penting bukan sahaja bagi ahli-ahli dan pelabur di dalam projek AWQAF, malahan juga kepada badan seperti Majlis Agama Islam Negeri selaku pihak berautoriti yang mentauliahkan status Mutawalli kepada AWQAF sebagai sebuah institusi Waqaf Korporat, milik umat.

DANA DAN KEAHLIAN AWQAF



Alhamdulillah, sepanjang tahun 2020, pelbagai aktiviti telah AWQAF jalankan bagi memberi pencerahan berkenaan Waqaf Korporat, termasuk pendedahan dan pendidikan serta dakwah berterusan berhubung manfaat Waqaf Korporat kepada masyarakat khususnya dan potensi impak instrumen wakaf kepada ekonomi negara secara amnya. Kesedaran dan pengetahuan masyarakat telah diterjemahkan dengan penerimaan dana AWQAF terkumpul pada 31 Disember 2020 adalah sebanyak RM12.82 juta, pertambahan sebanyak RM141,377.00 sepanjang tahun 2020, dengan jumlah penyumbang pewakaf seramai 3,182 iaitu seramai 675 Ahli dan 2,507 penyumbang Asas. Jumlah dana AWQAF dan ahli terkini sehingga 31 Jun 2021 adalah sebanyak RM12.91 juta dengan penyumbang pewakaf seramai 3,376 iaitu 715 Ahli dan 2,661 penyumbang Asas. Antara inisiatif pihak pengurusan adalah memberi galakan berterusan kepada para penyumbang Asas bagi meningkatkan sumbangan wakaf mereka sehingga menjadi Ahli penuh yang layak mengundi, iaitu minimum Ahli Hadid (jumlah wakaf RM1,000).

Bagi pihak AWQAF, kami bersyukur dan berterima kasih di atas amanah dan kepercayaan yang diberikan terutama oleh ahli-ahli baru dalam menjayakan himpunan dana wakaf tersebut. Sumbangan-sumbangan ini juga disokong dengan strategi media massa dan promosi bagi meningkatkan lagi imej AWQAF di mata masyarakat, seterusnya mendapat kepercayaan serta sokongan orang ramai untuk meruskan agenda wakaf sebagai agenda nasional.

Selain dari aktiviti-aktiviti yang berkaitan ilmu dan kesedaran Waqaf Korporat yang sentiasa diteruskan dari masa ke semasa, pihak AWQAF juga berusaha meneroka peluang-peluang pelaburan yang turut dapat memberi pulangan semula kepada ahli-ahli. Program-program bantuan perniagaan juga sedang dalam proses dibangunkan dengan pelancaran Dana Wakaf Tijarah dengan kerjasama Dewan Perdagangan Islam Malaysia (DPIM), yang mana telah berjaya mengumpulkan sebanyak RM21,400, setakat Jun 2021. Pihak AWQAF bersetuju untuk memadankan jumlah dana Wakaf Tijarah yang terkumpul ini agar jumlahnya digandakan. Satu program roadshow (secara fizikal dan atas talian - online) telah diusahakan oleh pihak pengurusan tertinggi DPIM bersama DPIM Negeri-Negeri bagi memaklumkan mengenai AWQAF dan inisiatif kerjasama Wakaf Tijarah. Ini sekaligus dapat memberi manfaat yang lebih luas kepada ahli DPIM dan Awqaf untuk meneroka peluang perolehan pendapatan yang dapat dikongsi bersama oleh AWQAF dan ahli DPIM.

DANA WAKAF TIJARAH DPIM - AWQAF

Perkasakan perjuangan agenda Wakaf Korporat DPIM dengan menjadi sebahagian daripada ahli AWQAF Holding Berhad.

Himpunan dana wakaf tijarah akan membantu dana pusinan ribu pinjaman khas bagi pelaksanaan projek pembiayaan ahli - ahli DPIM.

Wakaf anda akan dihimpunkan sebagai dana wakaf tijarah ahli DPIM bersama AWQAF. Konsep tabung ini adalah menitik beratkan agenda Yaadul Ulya.

Pulangan pinjaman dan hasil perkembangan projek pembiayaan ahli - ahli digunakan semula oleh ahli yang lain dari semasa ke semasa.

Sesungguhnya, AWQAF menyeru dan menggalakkan ahli-ahli yang sedia ada serta masyarakat awam secara amnya, untuk terus menyumbang wakaf kepada AWQAF. AWQAF perlu terus melaksanakan inisiatif bagi mengembangkan dana wakaf ini secara berterusan dan pada masa yang sama memastikan projek-projek ekonomi serta aktiviti-aktiviti pembangunan sosial yang sedang dilaksanakan akan dapat terus berjalan secara lestari. Inisiatif dan aktiviti keilmuan bagi kesedaran Waqaf Korporat sama ada melalui Webinar, media sosial maupun media utama seperti radio akan terus diusahakan bagi manfaat Ummah secara keseluruhannya.

Pelan bagi meningkatkan hubungan komunikasi antara AWQAF dan para ahli juga telah dilaksanakan secara berperingkat melalui AWQAF media. Laman web portal ahli yang telah dibangunkan melalui awqaf.com.my/mywaqf/, turut memudahkan pengurusan pendaftaran ahli secara atas talian, selain memudahkan semua urusan sumbangan wakaf yuran ahli dan sumbangan wakaf tunai lainnya, termasuk sumbangan kepada Tabung khas ZuriatCARE, EduWAQF dan AWQAF4Health. Satu bentuk komunikasi kemaskini (update) secara berjadual melalui aplikasi Whatsapp juga giat berjalan sebagai sokongan kemaskini komunikasi melalui media sosial Facebook dan lawan sesawang Awqaf.

INISIATIF PELABURAN AWQAF

SEKOLAH ANTARABANGSA INTEGRASI AL-HAMRA

Walaupun berdepan keadaan pandemik Covid-19 yang tidak menentu, AWQAF dalam tahun 2020 telah mengorak langkah dan komited dalam memastikan dana wakaf yang diuruskan ini dapat dimanfaatkan ke arah memperkasakan ekonomi Ummah seterusnya membantu mereka yang memerlukan sepertimana yang pernah dilaksanakan ketika era kegemilangan Tamadun Islam terdahulu. Antara elemen ketamadunan yang sangat penting dan memerlukan kepada dokongan dan sokongan institusi wakaf adalah pemerkasaan sektor pendidikan dan kesihatan. Ini juga amat seiring dengan fokus portfolio pelaburan AWQAF yang telah dilaksanakan dan yang bakal dirancang pada masa hadapan.



AWQAF, dibawah program EduWaqt, telah mengambil inisiatif untuk mengambil alih dan menyambung usaha membangunkan Sekolah Antarabangsa Integrasi Al-Hamra, Kota Damansara. Satu inisiatif pelaburan yang penting bagi AWQAF untuk bersama-sama memperkasakan institusi pendidikan yang menjadi denyut nadi dalam pembangunan generasi akan datang. AWQAF turut menerima pakai sistem silibus IHES secara wakaf yang dibangunkan oleh pihak IHES Endowment Development Berhad, diketuai oleh Prof. Dr. Hasni Mohammed, pemilik kepada Sekolah Islam ADNI yang telah melaksanakan pendekatan silibus IHES iaitu Integrated Holistic Education System dan sistem pembelajaran tersebut telah digunakan oleh lebih seribu sekolah di seluruh dunia. Sistem ini sedang dilaksanakan di sekolah Al-HAMRA dan akan menyemai para pelajar dengan ilmu aqli dan naqli, rohani dan jasmani secara holistik.

Melalui pelaburan ini, hasil yang dapat dijana oleh AWQAF buat masa ini adalah sehingga RM2 juta setahun. Disebabkan oleh kos operasi yang agak tinggi iaitu sebanyak RM2.7 juta setahun, pada masa yang sama, pihak pengurusan juga turut berusaha merancang beberapa aktiviti pemasaran dengan lebih strategik sebagai usaha menambah lebih ramai pelajar Al-Hamra yang mempunyai kapasiti bangunan yang boleh menampung jumlah pelajar sehingga 600 orang. Dengan pertambahan jumlah pelajar ini, jangkaan jumlah hasil yang berpotensi dijana oleh

AWQAF pada 2-3 tahun akan datang adalah sekitar RM4 juta hingga 5 juta setahun. Walaupun projek ini mempunyai potensi masa depan yang sangat baik, tetapi buat masa ini dengan kapasiti pelajar yang rendah dan kos operasi yang agak tinggi, AWQAF menyeru dan menjemput ahli-ahli serta masyarakat awam untuk terus menambah sumbangan wakaf bagi membantu kelangsungan dan kesinambungan institusi pendidikan Islam ini, yang mana ia secara tidak langsung akan memberi manfaat kepada pembangunan ketamadunan Islam.

Hasil dari pelaburan dari sektor pendidikan akan terus di salurkan di bawah program EduWaqt. AWQAF berazam selain komited meningkatkan taraf dan potensi institusi pendidikan Islam dari semasa ke semasa, AWQAF bertanggungjawab untuk membina generasi pelajar yang bakal menjadi pemimpin akan datang sebagai peneraju ketamadunan Islam yang cemerlang. Justeru antara inisiatif yang bakal diperlakukan AWQAF adalah peluang biasiswa pembelajaran kepada golongan pelajar B40 yang berpotensi di sekolah milik AWQAF.

PUSAT KECERGASAN (FITNESS) & KESEJAHTERAAN (WELLNESS) WANITA CURVES



Bertitik tolak daripada saranan yang diutarakan oleh Pengurus AWQAF, Tan Sri Siti Sa'diah Sheikh Bakir bagi meneroka industri kesihatan dan kecergasan yang telah menghasilkan nilai pendapatan berjumlah RM20.5 billion di seluruh Asia Pasifik, AWQAF telah meneroka dan membuka satu francis pusat kecergasan wanita CURVES Malaysia di Bukit Jelutong bermula pada Mac 2020. Antara faktor yang menjadi tarikan kepada francis ini, pelanggan hanya perlu meluangkan masa selama 30 minit untuk setiap sesi dan tiada had maksima yang diberikan kepada mereka untuk hadir ke gimnasium. Inisiatif ini bukan sahaja dilihat sebagai suatu projek pelaburan Wakaf dalam industri kesihatan dan kecergasan, tetapi ia juga secara tidak langsung memberi peluang kepada para wanita di Malaysia untuk menjaga kesihatan di satu kemudahan gimnasium yang patuh Syariah, berkonsepkan latihan litar (circuit training),

dan paling penting selamat untuk wanita.

Pihak pengurusan sedang dalam usaha merancang beberapa aktiviti pemasaran dan pendekatan yang lebih strategik dalam menambah lebih ramai ahli dan pada masa yang sama mengekalkan ahli sedia ada. Walaupun prestasi semasa CURVES Bukit Jelutong berdepan pandemik COVID-19 amat menyukarkan operasi, AWQAF tetap merancang untuk membuka beberapa lagi outlet CURVES, satu outlet pada akhir tahun 2021 di kawasan Setia Alam dan satu lagi outlet pada pertengahan 2022 bagi mengembangkan lagi segmen perniagaan kercergasan ini. Dengan pembukaan tiga outlet ini dan sasaran keahlian sebanyak 175 ahli setiap outlet, jangkaan hasil yang berpotensi dijana oleh AWQAF adalah sehingga RM1 juta setahun. Selain itu juga, terdapat juga inisiatif dan perbincangan AWQAF bersama pihak DPIM Negeri Johor dan DPIM Negeri Perak bagi merancang pembuka outlet CURVES di kawasan Johor Bahru dan Ipoh. Semoga usahasama dalam membangunkan perniagaan berkonsepkan gimnasium wanita ini membuka lebih banyak peluang baru untuk AWQAF terus mengembangkan pelaburan dalam bidang kesihatan & kecergasan.

LAIN-LAIN AKTIVITI PELABURAN – FOKUS PELAN STRATEGI 5 TAHUN

Bagi memberi impak kewangan yang positif kepada AWQAF untuk lima tahun yang akan datang, barisan Ahli Lembaga Pengarah dan pengurusan AWQAF akan memberi fokus utama portfolio pelaburan kepada 4 industri penting iaitu harta tanah, kesihatan, pendidikan dan teknologi digital.



Di dalam pelaburan kesihatan, projek pelaburan lain yang telah dilaksanakan adalah pelaburan bersama pihak USAINS Holding Sdn Bhd, anak syarikat Universiti Sains Malaysia (USM) bagi pelaburan mesin medikal bagi kegunaan Hospital USM (bahagian swasta), Kota Bharu, Kelantan, yang mana projek tersebut telah menjana pendapatan yang berterusan kepada pihak AWQAF. Usaha dan program pembelian mesin seperti ini akan diteruskan kepada beberapa syarikat dan institusi lain yang sedang di dalam perbincangan seperti KAMOSA Sdn Bhd bagi pembelian mesin projek kontrak bersama Indah Water Konsortium (IWK).

Bagi pelan pelaburan berdasarkan teknologi digital, pihak mesyuarat lembaga pengarah AWQAF juga telah bersetuju untuk mengambil peranan sebagai salah satu Ahli Pengasas Pemegang Saham di dalam

penubuhan Bank Wakaf Digital (AWQAF Islamic Digital Bank) bersama-sama Halim Mazmin Berhad, Waqaf An-Nur Corporation Berhad dan Grup Majalah Karangkraf Sdn Bhd dalam permohonan Lesen Perbankan Digital daripada Bank Negara Malaysia. Sistem perbankan wakaf yang dicadangkan akan membantu mencapai matlamat memupuk kestabilan sistem kewangan dengan adanya institusi wakaf yang menggunakan sumber kewangan bagi pelaburan yang mana pulangan akan memberi manfaat kepada kesejahteraan ummah. Penggabungan pengurusan wakaf dengan bank digital pasti akan memulakan lembaran baru dalam penerimaan ummah terhadap amalan wakaf. Awqaf yakin bahawa potensi waqaf sebagai ekonomi ketiga dapat digarap melalui sistem kewangan Islam yang berteknologi tinggi. Ini diperkuuhkan lagi dengan perlaksanaan amalan wakaf dengan cara digital yang lebih sistematik, efisien, mudah dan selamat.



Dalam pada itu, AWQAF juga sentiasa meneruskan usaha mencari projek harta tanah berskala sederhana yang sesuai untuk dibangunkan, yang mana usaha ini akan di buat dalam bentuk sendirian ataupun kolaborasi strategik bersama agensi-agensi yang berkaitan kerajaan dan swasta bagi mengembangkan dan menambah nilai sumber dana wakaf. AWQAF juga telah memulakan inisiatif dengan pelan cadangan pembangunan bersama pihak Perbadanan Menteri Besar Negeri Sembilan di kawasan Bandar Sri Sendayan bagi membangunkan Pusat Kesihatan dan Penjagaan Ambulatori (Ambulatory Care Centre – ACC), Residensi Warga Emas Premier dan Kompleks kediaman 5 tingkat Serviced Apartment. AWQAF telah mengenal pasti satu tapak tanah sebesar 5 ekar berhampiran Masjid Sri Sendayan yang berpotensi untuk dibangunkan 3 projek pembangunan bersepadu ini. Pihak AWQAF telah beberapa kali membuat pembentangan cadangan pembangunan ini dan masih menunggu maklum balas rasmi dari pihak Perbadanan Menteri Besar Negeri Sembilan. Banyak usaha telah dibuat oleh pihak AWQAF dan usaha projek pembangunan harta tanah ini akan diteruskan perlaksanaannya, sama ada di tapak tanah tersebut ataupun di tapak tanah lain yang berpotensi untuk dibangunkan dengan kerjasama pihak Perbadanan Menteri Besar Negeri Sembilan, kerana perkhidmatan Residensi Warga Emas Premier ini merupakan satu industri yang berpotensi besar pada masa akan datang, yang mana Malaysia sedang berdepan cabaran Negara Tua 2030.

PROGRAM FI-SABILILLAH

Seperti yang semua ahli sedia maklum, ciri asas Waqaf Korporat adalah menghimpun dan memeliha sumber (accumulate & conserve resources) yang mana ianya dilaksanakan melalui pembahagian keuntungan bersih perniagaan kepada dua bahagian; iaitu 70 peratus daripada keuntungan dilaburkan semula dan 30 peratus disalurkan kepada aktiviti fi sabilillah. Dengan adanya perolehan keuntungan daripada pelaburan projek-projek yang disebutkan di atas, sumber dana untuk Tabung Khas ZuriatCARE, EduWAQF dan WAQF4Health dijangka akan meningkat, sekali gus berpotensi memperluaskan impak program fi sabilillah AWQAF untuk manfaat masyarakat.

YAYASAN ZuriatCARE



Yayasan Zuriatcare telah mendapat kelulusan penubuhannya oleh Bahagian Hal Ehwal Undang-Udang, Jabatan Perdana Menteri pada Ogos 2020. Di bawah pimpinan pengurusnya iaitu Puan Alia bt. Muhammad Ali, pelbagai program dan aktiviti telah dijalankan dan dipertanggungjawabkan sebagai badan amal fi-sabilillah. Sehingga 31 Disember 2020, jumlah dana keseluruhan sumbangan ZuriatCARE adalah sebanyak RM155,537.00. Jumlah agihan dana ZuriatCARE yang telah dibuat sepanjang tahun 2020 adalah sebanyak RM46,623.00. Dana ZuriatCARE ini telah digunakan untuk memberi sumbangan dan sokongan kepada beberapa badan bukan kerajaan (NGO) yang aktif melindungi remaja wanita, terutama yang terlibat dengan masalah anak tidak sah taraf dalam program Peluang Kedua. Selain usaha tersebut, Yayasan Zuriatcare turut mengembangkan lagi capaian mereka kepada masyarakat dengan aktiviti-aktiviti kesedaran lain, seperti menubuhkan program baru dibawah Yayasan iaitu Program Kempen Inklusif Kesedaran Kesihatan dan Penyakit Mental yang diberi nama Camellia (Campaign for Mental Illness Inclusivity and Awareness) dan Advokasi Kesedaran Bunuh Diri, AWAS (Awareness Against Suicide) yang mana kita terpaksa akui semakin serius apabila dikaitkan dengan tekanan sosioekonomi akibat pandemik Covid-19.

Modul Intervensi Rumah Perlindungan Gadis Terlibat Seks Luar Nikah telah selesai disiapkan pada Ogos 2020 dengan kerjasama kumpulan Penyelidik Fakulti Sains Sosial dan Kemasyarakatan (FSSK), Universiti Kebangsaan Malaysia (UKM) yang diketuai oleh

Dr. Nasrudin Subhi. Cetakan awal modul tersebut telah dibuat pada Disember 2020 dan pihak Yayasan sedang berusaha mendapatkan dana untuk mengimplementasikan modul tersebut bagi tujuan projek rintis dan bakal digunakan oleh rumah-rumah perlindungan remaja yang mesra dengan Yayasan Zuriatcare dengan memberi tumpuan kepada enam aspek utama iaitu kesihatan, kesejahteraan psikologi, sokongan sosial, pendidikan dan keselamatan serta kewangan dan keusahawanan. Hasil dari projek rintis tersebut, adalah diharapkan modul ini berupaya untuk membantu pihak yang berkepentingan khasnya Kementerian Pembangunan Wanita, Keluarga dan Masyarakat (KPWKM) dan diterima pakai di rumah-rumah perlindungan di seluruh negara untuk melaksanakan intervensi terhadap ibu-ibu hamil luar nikah secara berkala.

Sepanjang tahun 2020/21, ZuriatCARE telah meneruskan program bersempena dengan bulan Ramadan 1442H dan salah satunya iaitu 'Projek Bakul Ramadan' #selamatkan2jiwa. Projek ini bertujuan membantu meringankan beban remaja dan bayi yang memerlukan bantuan di rumah perlindungan yang terpilih. ZuriatCARE juga telah bekerjasama dengan Malaysians Against Pornography (MAP) bagi menjalankan Kempen Sentuhan Selamat & Sentuhan Tidak Selamat dengan mencetak buku panduan sentuhan bagi kanak-kanak yang akan dijual dan diedarkan di sekolah-sekolah rendah seluruh negara. ZuriatCARE juga telah merancang beberapa program dan aktiviti berimpak tinggi bagi tahun 2020/21, agar mesej, maklumat dan kesedaran yang ingin disampaikan kepada golongan sasar remaja ini dapat dicapai secara maksimum. Satu program berbentuk teater sedang dirancang dan akan dipentaskan, walaubagaimanapun, disebabkan oleh keadaan pandemik COVID-19, program ini akan ditangguhkan ke suatu masa di suku akhir tahun 2021.

PROGRAM EduWAQF & AWQAF4Health



AWQAF melalui Tabung Wakaf Khas EduWAQF akan terus mengangkat tamadun keilmuan dengan memperkasa pelajar-pelajar dan institusi-institusi pendidikan melalui kelestarian sumber wakaf, selari dengan salah satu matlamat dan tujuan Maqasid Syariah yang telah digariskan oleh Islam iaitu pemeliharaan akal. Sehingga 31 Disember 2020, jumlah dana keseluruhan manfaat EduWAQF adalah sebanyak RM267,424.00.

Program EduWAQF telah memberi sumbangan berjumlah RM4,500.00 kepada Yayasan Orang Buta Malaysia - "Program Bantuan Bahan Bacaan Braille untuk 100 Orang Kanak-kanak", dan bekerjasama dengan Persatuan Bangun Bersama bagi penajaan 60 orang pelajar di kalangan keluarga B40 miskin bandar dalam program tuisyen dan kelas mengajai Al-Quran. AWQAF telah menaja melalui Tabung Edu-Waqf sebanyak RM3,000.00 sebulan untuk tempoh 4 bulan (April, Mei, Jun & Julai 2021) untuk program tersebut di sekitar Lembah Klang.

Seperti yang telah dinyatakan di awal kenyataan korporat ini, AWQAF telah mengambil inisiatif dengan melancarkan Wakaf Khas COVID-19 bertujuan untuk pembelian mesin ventilator pesakit Covid-19. Mesin ventilator tersebut telah diserahkan kepada Unit Rawatan Rapi (ICU) Hospital Kajang dan telah selamat digunakan untuk membantu pernafasan pesakit Covid-19. Alhamdulilah dana yang telah berjaya dikumpul adalah sebanyak RM25,445.00.

PENGHARGAAN & PENUTUP

Bagi pihak Lembaga Pengarah, kami merakamkan setinggi penghargaan khas kepada semua ahli-ahli AWQAF di atas keyakinan dan kepercayaan terhadap konsep institusi Waqaf Korporat serta sokongan mereka terhadap institusi AWQAF. Tanpa keyakinan dan kepercayaan ahli-ahli adalah mustahil institusi Waqaf Korporat yang seperti AWQAF dapat merealisasikan pelaburan dan memperolehi hasil yang dapat disalurkan kembali kepada ummah. Awqaf Holdings dapat terus berdiri teguh sehingga hari ini adalah dengan sokongan dan doa dari semua ahli-ahlinya.

Settinggi-tinggi penghargaan ditujukan kepada ahli-ahli lembaga pengarah yang telah banyak berjasa mewaqafkan idea dan keringat khasnya Puan Sri Noorzilah Mohammed Ali, Prof. Dr. Engku Rabiah Adawiyah Engku Ali, Pn. Azizah Abdul Rahman, Datuk Dr. Mohd Ghazali Md. Noor, Puan Rafe'ah Ariffin, Dato' Khairul Shahril Hamzah & Dr Ridzwan Bakar yang sudi bersama dalam memartabatkan agenda Waqaf Korporat dan AWQAF Holdings Berhad ke peringkat yang lebih tinggi.

وَبِاللّٰهِ التَّوْفِيقُ وَالْهٰدِيَةُ وَالسَّلَامُ عَلٰيْكُمْ وَرَحْمَةُ اللّٰهِ وَبَرَكَاتُهُ

Bagi pihak Lembaga Pengarah Awqaf Holdings Bhd,

TAN SRI SITI SA'DIAH SHEIKH BAKIR
Pengerusi

Penghargaan juga perlu kami tujuhan kepada pihak pengurusan dan warga kerja AWQAF atas dedikasi mereka terhadap usaha mengembangkan agenda Waqaf Korporat yang diketuai oleh Pengarah Eksekutif, En. Abdul Mohsein Mohd Shariff dan dibantu oleh En. Ibrahim Adham Asmail (Ketua Pegawai Operasi), Pn. Khairunnisa Mazlan (Pengurus Kewangan) dan semua anggota pekerja lain yang amat komited dan berdedikasi. Sumbangan besar mereka telah memungkinkan AWQAF berjaya mengatasi segala cabaran, halangan dan rintangan, terutama dalam situasi ekonomi yang sangat mencabar kini.

Tidak ketinggalan juga, penghargaan kepada pihak setiausaha syarikat Virtu Management House Sdn Bhd yang diketuai oleh Puan Fatiadriati Mohd Tareh dan Puan Fatintafrina Mohd Tareh. Semoga AWQAF akan terus berada di atas landasan yang tepat ke arah pencapaian yang lebih gemilang, insya Allah.

Marilah kita meletakkan perjuangan melawan pandemik COVID-19 dan usaha sama memulihkan semula ekonomi Malaysia sebagai medan terbaik untuk kita bermuhasabah dan kembali memperhambakan diri dengan sebaik – sebaiknya kepada Allah SWT. Jadikan usaha ini sebagai medan kita mencapai ketakwaan dan akhirnya menuju "Mardhatillah".

Akhirnya settinggi-tinggi penghargaan kepada semua Ahli AWQAF di atas sumbangan, kepercayaan dan amanah yang diberikan dalam memperjuangkan Jihad Bisnes dan agenda Waqaf Korporat. Kami yakin sokongan padu yang diberikan oleh semua ahli, juga anggota masyarakat amnya disertai irungan doa restu semua, akan memberi kekuatan dan suntikan semangat baru kepada pengurusan AWQAF untuk meneruskan perjuangan. AWQAF akan memastikan bahawa harta wakaf yang diuruskan dapat menjana hasil dan pendapatan baru dari masa ke semasa. Hasil daripada wakaf itu diharapkan dapat terus berkembang dalam jumlah yang lebih besar dan dapat dimanfaatkan oleh seluruh umat Islam khasnya di Malaysia dan umumnya di seluruh dunia. Semoga Allah SWT memberkati usaha AWQAF ini.

Stay safe, Stay healthy.

MOHAMAD SAHAR MAT DIN
Timbalan Pengerusi